

**Ո Ր Ո Շ ՈՒ Մ թիվ 208**  
**վարչական տույժ նշանակելու մասին**

«07» սեպտեմբերի 2022թ.

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետ Արտաշես Ղամբարյանս, քննելով Իրանի Իսլամական Հանրապետության քաղաքացի Սիամակ Ռահիմի Ասգարի կողմից մաքսային կանոնների խախտում կատարելու վերաբերյալ նյութերը,

**Պ Ա Ր Զ Ե Ց Ի**

2022 թվականի հունիսի 13-ին ՀՀ ՊԵԿ ՄԴՊՎ ՍՏ բաժնի Մեղրիի բաժանմունքի և ՀՄՎ Մեղրիի մաքսային կետ-բաժնի աշխատակիցները Մեղրիի մաքսային կետ-բաժնի տարածքում զննության են ենթարկել ԻԻՀ-ից ՀՀ ժամանած, ԻԻՀ քաղաքացի Սիամակ Ռահիմի Ասգարի կողմից շահագործվող «HOWO» մակնիշի, 73B749/50-10 պետհամարանիշի բեռնատարը, ինչի արդյունքում, նշված բեռնատարի տարբեր մասերից հայտնաբերվել է ապրանքների հայտնաբերումը դժվարացնող եղանակով մաքսային հսկողությունից թաքցված ծխախոտներ: Մասնավորապես՝ բեռնատարի ցիստեռ-կցորդիչի տակ ամրացված կապույտ պլաստմասե բաքերի միջից, ցիստեռ-կցորդիչի կողային սառնարանի ստորին հատվածից, ցիստեռ-կցորդիչի մետաղական կիսակցորդիչի տակից, բեռնատարի խցիկի դիմապակու վերին հատվածի դարակից, մահճակալի միջից, մահճակալի տակ գտնվող արկղերի միջից, քնելու համար նախատեսված 2-րդ հարկի թախտի միջից, աջ և ձախ դռների միջից, նստարանների միջից, խցիկի ձախ հատվածի ստորին մասում գտնվող ապահովիչների բլոկի միջից հայտնաբերվել են «Wisdom SUPER SLIMS» գրառմամբ 548 բլոկ, «Wisdom BLACK» գրառմամբ 240 բլոկ, «VEE'S» գրառմամբ 532 բլոկ, «ROYAL» գրառմամբ 250 բլոկ ծխախոտներ:

Փաստի առթիվ վարորդ ԻԻՀ քաղաքացի Սիամակ Ռահիմի Ասգարի նկատմամբ ՀՀ մաքսային օրենսգրքի 201-րդ հոդվածի հատկանիշներով հարուցվել է մաքսային կանոնների խախտման վերաբերյալ վարույթ, իսկ իրավախախտման անմիջական օբյեկտ համարվող վերոնշյալ ապրանքներն ի պահ են հանձնվել Մեղրիի մաքսային կետ-բաժնի մաքսային հսկողության տարածքում:

Վարչական վարույթի շրջանակներում ծխախոտների շուկայական արժեքները պարզելու նպատակով 16.06.2022 թվականին նշանակվել է ապրանքագիտական փորձաքննություն, որի կատարումը, հիմք ընդունելով ՀՀ ՊԵԿ-ի և ՀՀ ԱՆ «Փորձագիտական կենտրոն» ՊՈԱԿ-ի միջև առկա պայմանագիրը, հանձնարարվել է «Փորձագիտական կենտրոն» ՊՈԱԿ-ին:

Վարչական վարույթի շրջանակներում թիվ 233 մտից համարի զեկուցագրով հարցում է կատարվել ՀՀ ՊԵԿ Հարավային մաքսատուն-վարչության համապատասխան ստորաբաժանմանը՝ ճշտելու վերոնշյալ ծխախոտների մաքսային արժեքները և վճարման ենթակա մաքսային վճարների չափերը:

ՀՀ ՊԵԿ Հարավային մաքսատուն-վարչության մաքսային գործառնությունների բաժնի թիվ 240 մտից համարի տեղեկանքի համաձայն՝ 2022 թվականի հունիսի 13-ի դրությամբ «Wisdom» անվանումով «SUPER SLIMS BLUE» տեսակի 548 բլոկ ծխախոտի մաքսային արժեքը կկազմեր **191800** ՀՀ դրամ, «Wisdom» անվանումով «BLACK» 240 բլոկ տեսակի ծխախոտի մաքսային արժեքը կկազմեր **84000** ՀՀ դրամ, «VEE'S» անվանումով «NANOTEK WHITE» տեսակի 532 բլոկ ծխախոտի մաքսային արժեքը կկազմեր **202160** ՀՀ դրամ, «ROYAL» գրառմամբ «NANO BLUES ORCHID» տեսակի 250 բլոկ ծխախոտի մաքսային արժեքը կկազմեր **87500** ՀՀ դրամ:

15.08.2022 թվականին վարչական վարույթը երկարաձգվել է:



ԵՏՄ մաքսային օրենսգրքի 2-րդ հոդվածի 1-ին մասի 25-րդ ենթակետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ **եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:**

Վարչական վարույթի շրջանակներում հարցում է կատարվել ՀՀ Ոստիկանության անձնագրային և վիզաների վարչությանը նպատակ ունենալով պարզել քաղաքացի Սիամակ Ռահիմի Ասգարի հաշվառման վայրը:

Ի պատասխան հարցման՝ ՀՀ Ոստիկանության անձնագրային և վիզաների վարչությունը տրամադրել է տեղեկատվություն առ այն, որ քաղաքացի Սիամակ Ռահիմի Ասգարի հաշվառման վայրի վերաբերյալ տեղեկատվություն առկա չէ:

Քաղաքացի Սիամակ Ռահիմի Ասգարի սահմանափակումների պատմությունը ստանալու նպատակով հարցում է կատարվել ՀՀ ՊԵԿ Ներքին անվտանգության վարչությանը:

Ի պատասխան հարցման՝ ՀՀ ՊԵԿ Ներքին անվտանգության վարչությունը տրամադրել է սահմանափակումների վերաբերյալ տեղեկատվություն՝ համաձայն որի քաղաքացի Սիամակ Ռահիմի Ասգարին 04.09.2022 թվականին ժամը 21:59-ին Ազարակ պետական սահմանի անցման կետով անցել է ԻԻՀ:



Այսպիսով, նյութերով պարզվել է, որ 2022 թվականի հունիսի 13-ին քաղաքացի Սիամակ Ռահիմի Ասգարը, մաքսային հսկողությունից թաքցնելով, իր կողմից շահագործվող «HOWO» մակնիշի, 73B749/50-10 պետհամարանիշի բեռնատարով, ՀՀ մաքսային սահմանով տեղափոխել է ընդհանուր՝ 565460 ՀՀ դրամ մաքսային արժեքով ապրանքներ, այսինքն՝ քաղաքացի Սիամակ Ռահիմի Ասգարի կողմից թույլ է տրվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ արձանագրությամբ, Հարավային մաքսատուն-վարչության թիվ 240 մտից համարի տեղեկանքով: Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ, 206-րդ, 219-րդ, 221-րդ և 224-րդ հոդվածներով,

### Ո Ր Ո Շ Ե Ց Ի


1. Իրանի Իսլամական Հանրապետության քաղաքացի Սիամակ Ռահիմի Ասգարին (հասցե՝ ԻԻՀ, ք.Հադիշար, Իմամի պողոտա, Ֆարանգի փողոց, տուն 9, անձնագիրը՝ R51990723) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված վերոնշյալ ապրանքների մաքսային արժեքի չափով՝ 565460 /հինգ հարյուր վաթսուհինգ հազար չորս հարյուր վաթսուն/ ՀՀ դրամի չափով:

2. Որոշման մասին հայտնել քաղաքացի Սիամակ Ռահիմի Ասգարին՝ պարզաբանելով ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ որոշումը կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

Սույն որոշմամբ նշանակված տուգանքի վճարման հաշվեհամարն է. 900005024055՝ 565460 /հինգ հարյուր վաթսուհինգ հազար չորս հարյուր վաթսուն/ ՀՀ դրամ, նշել 30 կողք:

ՀԱՐԱՎԱՅԻՆ ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ

ՄԾ ԳՆԴԱՊԵՏ



ԱՐՏԱՇԵՍ ՂԱՄԲԱՐՅԱՆ